



Tir Yimym

www.tirymim.in

Regd. No. RNI. NAGAAO/ 2004 / 13113. Postal-NE/RN-717.

e-mail : tirymim@gmail.com

TAPAK 3

Yangia anidakangma :



Tir Yimym



tir_yimym



tir yimym

TAPAK 8

Dhaka nung tayimtsü tsükokba
atema PM-i tejashi lemsatep

Asia Cup atema India-i
arutsü tejangraba mali: Tariq

VOL. XXII ISSUE NO. 277 (ADOK 277)

DIMAPUR

SANGTENNÜ (TUESDAY)

CHITENI (JULY) 22, 2025

₹ 5.00

Indo-Naga ken o nung RPP sangdong temangmangtsüka lir: WC, NNPGs

Dimapur, Chiteni/July 21 (TYO): Tia maka tawa Rising Peoples Party (RPP) ajanga media nung tejangja masüba sangdong ka agütsüba ajanga tang Indo-Naga yimten ken o jembishinüba junga mangatetba aser jangja maliba temai adoka sayur, ta WC, NNPGs sangdong ka ajanga ashi.

Ken o nung atsütepba parnoki mangatetba ajanga parnoki tajunglen nungi shilem magitetba sayur. Zünga-meteta aliba Naga National Workers indang jabaso aser jala temi mezüngbo RPP indang sentong kanga sakloka liasü, saka iba ama tongtipang onük - koba ajanga taoba mapang nisung takum aika samar aliba - nung tapi agi shilem agiba ya kanga tamashi lir, ta sangdong ajanga ashi.

Indian political party ka ama register süa aliba RPP ya kanga tashi mait lia arur, kechiaser parnoki State General Elections atema tetemsü candidate kata meshimteter.

Parnoki tang shilem agiba ya tajungba dang nungi tamajungba ang tuluba amai ajiteter, aser state telungzük nung terenlok maparen nung tetsükdaktsü ang agütsür, ta ashi.

Nagaland nung register süa aliba Indian political party yagi Naga nung puti otsü, maitsü aser yimtenren tejangraba nung timtem ang agütsür. Government of India den tang Indo-Naga peace deal tejembidak aliba indang Indian political party teyari kübok media nung o tamajung prokshiba ya magizükteter, ta WC, NNPGs ajanga ashi.

Tajunga süang - tamajunga süang, iba ama tangatetba ya nüburtemi kanga junga metet nung dang bendangtettsü. Ajisüaka state telungzük nungi registered political party nungi iba ama sangdong agütsüba yabo memelatsüla.

Negotiating party ka masü political party ka asünung, parnok teka sangshitsü temeden mali. Ajisüaka nüburtem ajangzüksüsa onük kar lemsateptsü lira, kechiba Naga Political Groups ajunga jazüka langpang nung mener parnok tebilemba melemsateper? RPP-i

Government of India nem kechi inyakdaktsüner? RPP-i otsü telung meteta lir asü?

'Nagas of Nagaland' atema "Agreed Position" nung ashikülak yimya amshiba atema taoba interlocutor R.N. Ravi tenüng amsemtsü RPP-i telemtetba agiba ya khenyongi mashi angatetba aser tamang katettsüla masü. Yamai angateta jembiba ya mashi memetet, tamendak dak maka aser mashi lenmang len anisar ta shitettsü, ta WC, NNPGs ajangasa ashi.

Naga yimten ken o jembiba dak sendakba nung Government of India tenüng nung AK Mishra-i state semdangba ya nübur rongsen amakok nung indokba lir, ta RPP ajanga aitsü.

Indian political party tasen ka ama RPP yagi tang Indo-Naga political tensa jangja-jangja angatettsüla. Parnok ya social media nung blogger ama masü nüburtemi metetba political party ka ama alisüla, ta ashi,

RPP sangdong nung November 17, 2017 nung zülutepba 'Agreed Position' ya 'Nagas of Nagaland' atema tezüngzüktep ka lir ta ashi. RPP-i iba aser 'Status Paper' indang junga mangatetba ya tebilemtsü lir. 'Status Paper' ya kanga meranga rongsen indoka aser sarasadem teyari nung yangluba lir ta WC, NNPGs ajanga angatetdaktsüner.

Kaket tapak shia GoI aser NNPGs tsüngta kanga kumdanga jembishinüba, kong Naga puti otsü aser maitsü akumtsüboa amshiba shia lir aser Nagaland, Manipur, Arunachal Pradesh aser Assam nung Naga nung indang political aser administrative recognition agüja lir.

Naga nung aser GoI tsüngta zülutepba "Agreed Position" nung tepenja aliba aser shidakba otsü RPP-i mangatet.

Agreed Position ya Nagas of Nagaland atema lir ta shiri jembidir, ajibo asü-külak tangatetba aliba sayur alitsü. Aser RPP sangdong nung kija, lokti tentet mesüra entities kar lir asü ta tasüngdangba arur. Mapang nung ochi temai adoktsü, ta WC, NNPGs sangdong ajanga ashi.

CM Dr. Rio-i NH-29 nung alinen agi kongshir aliba tesemtem semdang



Hombarnü Nagaland Chief Minister Dr. Neiphiu Rio aser Deputy CM i/c National Highways, T R Zeliang nungeri NH-29 nung alinen alua aliba tesemtem sema senzüdang tangokba noksa ka yangi angur.

Kohima, Chiteni/July 21 (TYO): Hombarnü Nagaland Chief Minister Dr. Neiphiu Rio-i Kohima-Dimapur lenmang nung two-lane National Highway-29 semdanga liasü, kong tzunglu kanga sashia aruba ajanga tesem aitsü nung aline alua gari sadema mesenzüteti lir.

Old Kohima dumping site nung Chief Minister Rio aser Deputy Chief Minister T R Zeliang nati ali atsüoka ia aliba semdang aser State PWD ketdangsür, district administration aser Jotsoma village lenirtem den sensaksema liasü.

Nh-29 nung tesem ka nung ali atsüoka ia gari tila tem kisung saksa senzütetba asoshi CM Rio-i department dang lenmang tasen aontsü atema survey agitsü totuyuba agütsü aser district administration dang iba tesem nung ali kiburtem den land compensation indang jembitsü ashi.

Jana aser tzunglu tzü aotsü atema hume pipes tuluba inoktsü aser kilentzü aoba lenmang teti asoshi yanglutsü dena mera balala aginung ajungtsü ta pai ashi.

"Linük tesem balala nung apu talang-lang yangluba ama state nunga inyaktsüla," ta pai ashi.

CM-i department dang tzungluruwa tembangba sülen nungdakba mapa inyak tenzüksü asoshi National Highways nung raksar aliba

asir lenmang tamajung kanga junga asadanger proposal ka kübok inoktsü ashi.

Yimdaklir aser ali kiburtem tenüng nung Jotsoma village nungi lenir kati tanen makai ali anenzüka aoba ajanga temalen aliba yimtsüng nung kongshitsü tsüboa bilemba lemsatep aser CM dang protection aser retaining walls yanglu tenzüksü asoshi department nem totuyuba agütsütsü mepishia liasü.

Iba tesem semdangba mapang Deputy Commissioner, Kohima; Superintendent of Police, Kohima; PWD National Highway ketdangsür, ali kiburtem, Jotsoma yimtsüng nungi lenirtem aser district ketdangsürtem dena liasü.

Iba sülen osangbener den jembidang, slope protection work aser iba lenmang kilometre 12 yanglushiysü densema monsoon preparedness nung shilem ka ama state-i küm tetenzüklen proposal ka yoka lir, ta Deputy CM i/c National Highways, T R Zeliang-i ashi.

"Tera menuaka sen crore 24 sanction ka aruogo. June 23 nü tender agütsü aser July 30 tashi alitsü. Anungji tender tembangba sülen mapa tenzüksü," ta pai ashi.

Slope protection mapa inyakba indang jembidang, Pagla Pahar area nung technology tasen - geotextile aser geosynthetic mapa -

inyaktar aser kasa yimya yangia amshitsü merangtsü, ta Zeliang-i ashi.

"State asoshi iba technology ya tasen lir. Anungji asenoki inyakdangtsü aser iba tesem kumzüka ayutsü merangtsü," ta pai ashi.

Phesama nung NH-2 atsüoka ia aliba anogo 10 tsüngta renemtsü ta NHIDCL nungi temulunglemtsü o shiaka lenmang tasen lapokba nung menuba indang jembidang, NHIDCL ajanga lenmang shilem kar indokogo, saka ano maneni ali anenzüka alu aser ali kibur temi compensation atema jenjang matet, anungji ali tasen aontsü menur, ta pai ashi.

Chief Minister Rio aser team-i asüng Phesama lenmang semdangtsü aser raksar aliba lenmang tekeraba nung renemtsü atema NHIDCL den jembishinü akatsü, ta Zeliang-i metetdaktsü.

Nagaland nung Kohima aser kidanger state Manipur nung Mao sendaktepba lenmang danga ka atema jembidang, ibai proposal tasen ka asütsü saka ali kibur temi ali agütsüba dak keta lir, ta pai ashi.

"Alinen aluba nungi jenbuttsü lenmang ajak agi danga lenmang yanglutsüba dang, kechiaser tenem ajunga iba tesem nung ama anenzüka alur. Anungji yamaji mesüdaktsütsü merangtsü aser ali kibur temi mulungra proposal ka yoktsü," ta Zeliang-i ashi.

Phesama aser Kisama/Kigwema tsüngta lenmang lapokogo

Dimapur, Chiteni/July 21 (TYO): Deputy Commissioner, Kohima, B Henok Buchem, NCS ajanga July 21, 2025 nü Traffic Advisory ka agütsüba nung, taoba mapang metetdakja aliba nung ano maneni Phesama aser

Kisama/Kigwema tsüngta lenmang ua LMVs asoshi yanglushia lapokogo, ta ashi.

Kasa mapang nüburtem lendong timtem nungi kumzüka alitsü mechi Kisama (alinen agi kongshir alida) anasa National Highway-2 nung gari senzütsü

memelatsü, tongtipang masüba senzüsemponger temi akok tashi iba lenmang nung mesenzütsüla, amman nung mesenzütsü ajungshir aser tarutsü nung alinen alura gari senzüsempongba nokdangtsü, ta sangdong ajangasa ashi.

Community Health Officers (CHOs) training agiogo



Dimapur, Chiteni/July 21 (TYO): National Health Mission (NHM), Nagaland kübok Community Health Officers (CHOs) batch 8buba atema anogo pongu asoshi orientation training sentong July 21 nü SPMU Hall, Directorate of Health & Family Welfare, Kohima nung tenzükogo.

Ajak senteper CHO 19 induct süogo. Training lapokba sentong tatsüka agiba mapang Dr. Avile Zao, Mission Director, NHM-i, Ayushman Arogya Mandir (AAM) inyakyim kübok Primary Health Centre (PHCs) aser Sub Centre (SCs) tem ajak Health & Wellness Centres (HWCs) kümdaktsütsü atema India sorkar nükla aliba indang lemsatepa liasü.

Laisa, iba jenjang agiba den CHO temi jenjang shitak agiba ajanga Nagaland ajunga nung healthcare service tajungba agütsüba angur, ta ashi. Lai ashiba agi, CHO tem ya health

facility tem nung tongteprateptsü atema primary point ama inyaksangshir aser parnoki khuret timba, bendar, talisa Medical Officer tem maliba mapang nung parnoki khuret tem abener. Maneni lai, CHO temi bendanga agütsüba atema parnok nem tenüngsang agütsüba den maneni meranga inyaksü ajungshia liasü.

SPO-NHM Dr Keveduyi Theyo-i, CHO tasentemi bendanga agütsüba aser training meranga agiba atema tenüngsang agütsüba den, grassroot jenjang nung parnok ya tongteprateptsü atema primary point ama parnoki koda tongtubang shilem agir iba indang lemsatep. Paisa, lokti aser tenüngdakba health services tem tsüingda apu latsür ka ama CHO temi state indang primary healthcare system nung tongtubang shilem agiba indang lemsatep.

Paisa, parnok dang tesendaktep tajung ayutsü, kuli

kakettem jung junga mangaoka ayutsü aser lokti den takok ngua sendaktepa inyaksü koda tongtubang iba indang leshia metetdaktsü.

CHO batch 8buba induct asüba sülen Nagaland nung Sub-Centres (SCs) 336 Health & Wellness Centres (HWCs)-i ajungkettsü.

Training mapang Community Health Officers (CHOs) tasentem nem Health & Wellness Centres (HWCs) tem nung tongteprateptsü atema primary point aama inyaksü atema tenüngdakba shisatsü aser practical skills tem agütsütsü.

Training mapang, maternal & child health non-communicable disease screening, communicable disease control, adolescent & elderly care, palliative support, ENT issues, government health scheme tem, aser health service delivery atema digital tool tem dak sendakba nung tangazükba agütsütsü.

2025 Miss Mokokchung shimba sentong taonung akatsü

Dimapur, Chiteni/July 21 (TYO): Ajaki yongyaseta ataba "Miss Mokokchung 2025" shimba sentong 22nd July, 2025 aonung yangi Mokokchung town hall nung akatsü sentong renema lir. Taküm iba sentong ya Mokokchung District Art & Culture Council aküm nung Forerunners Mokokchung-i "beyond beauty" omen dak rangloker ayonga akar.

Online aser offline tetendanga balala agir külen, kongrular parnok 13 shimteta lir aser 'Miss Mokokchung 2025' kurang asoshi parnok rongnung tokteptsü. 22nd July, 2025 aonung 6:00 ako nungi iba

sentong tenzüktsü aser iba aonung Guest Appearance-ji Femina Miss India Kerala 2024, Akshatha Das aser Femina Miss India Manipur 2024, Chanchui Khay na jaoka lir aser tena Mokokchung tonga aruogo.

Küm asem (3) sülen iba Miss Mokokchung tetoktepa ya akar, anungji, taküm küm yabo terenemshiba tulu lir, tereprangi arurtema tezü metangdaktsütsüa onoki iba sentong ya tajungtiba nung sayutsü, ta tayongertermi tanü Hotel Whispering Wind nung osangbener den jembidang metetdaktsü.

(Maneni tapak 3 nung)

NSF-i tetushi agütsüba sentong indang metetdaktsü

Dimapur, Chiteni/July 21 (TYO): Naga Students' Federation (NSF)-i sangdong ka ajanga, 2025 küm HSLC aser HSSLC tatidang nung Naga nunger topper tem nem tetushi agütsüba sentong ka July 25 nü 11 ako nungi tenzükba SIRD Auditorium, Secretariat Road, Kohima nung agitsü ta metetdaktsüogo.

Federation-i Naga nunger kaketshirtem shironki bendanga agüja meranga inyaka lokti nem konang tetushi bener arutsür, parnok tushiba nung nema adanger.

Iba tetushi agütsüba sentong ajanga, kakets shisatsü bushiba nung kaketshirtem maneni

ajungmesotsü aser takok tajung anguba tanüla ajungkettsü atema NSF bendanga agütsür aliba sayur, ta kasa sangdong ajanga metetdaktsü.

Tetushi agütsüba sentong ya Minister for Rural Development & SIRD, Government of Nagaland, Eno. Metsübo Jamir-i alakteta jaoker ama maotsütsü. Iba sentong nung pai shilem agiba ajanga sentong mera taketba kümdaktsüba den takok angurtem aser kaketshirtem tali ajungmesotsü.

NSF-i, topper tem tsürapur/guardian tem, federating unit tem aser Federation indang subordinate bodies tem iba sentong nung shilem agitsü jaokogo.

Paramedical course atema metetdaktsü

Dimapur, Chiteni/July 21 (TYO): International University Nagaland osang dak ajemdaker Sub-Divisional Officer (C), Mon, Ajit Kumar, IAS-i, Paramedical courses (Bachelor of naturopathy aser Yogic Sciences- BNYS; Bachelor of Physiotherapy- BPT; aser Bachelor Degree in Medical Laboratory Technology - BMLT) atema Mon district nungi candidate 5 nominate asütsüba indang metetdaktsüogo.

International University, Nagaland, Dimapur nung taküm session ya July 25 nü nungi

tenzüktsü.

Iba dak sendakba nung institution tem dang pei school aser college tem nung iba indang osang ya ayimsünga prokshitsü aser nomination tem Principal, Government Wangkhao College Mon, Dr. Tialila (Contact No. 9436817059) dangi yoktsü metetdaktsüogo.

Course asemprongla atema candidate tem bendena Deputy Commissioner Office, Mon dangi July 20 nü tashi nungbo yoktsüji Wangkhao College Mon Principal khuret asütsü.

BAN-i ayongzüka financial literacy workshop ka agi



Dimapur, Chiteni/July 21 (TYO): Business Association for Nagas (BAN), aser Addwell Wealth India & Indo-German Education & Work Exchange (IGewe) na longjemer BAN Conference Room, Dimapur nung comprehensive financial literacy session ka takok ngua agiogo.

Iba workshop ya Addwell Wealth India nungi Nischay Jain aser Associate Director Komal Jain na lenisüba nung agia liasü. Workshop ya budgeting, goal setting, aser smart investing densema financial planning dak rangloker agi, koba ajanga sentong nung shilem agirtem pei jurila aser business finances

renloka odaktsütsü aser achaayangtsü asoshi tenüngdakba hadirtem agütsüogo.

Sentong nungsa BAN Advisor Thangi Manen-i, workshop nung shilem agirtem dang modern entrepreneurship nung financial literacy ya tongtubang shilem ka ama agitsü ajungshia liasü. "Tanü shishilemba balala kanga melenshia aoba mapang financial planning angatetsüji kanga tongtubang lir. Iba session ya senotsü rizünga ayutsü atema yimya sübatsü asoshi angazüktsü aser osang tejangja agir senotsü intoktsü atema angazüktsü asoshi maongka

tajung ka lir," ta lai ashi.

BAN indang women's wing tenüng nung jembiba mapang, Vice President Zubeno Mozhui-i, tarutsü yangertsü atema financial education-i koda tongtubang shilem agir, iba indang lemsatep. "Rongsenketzüng shisatsü shitak aliba ajanga nisung ka nem telemtetba tajungba agitsü, sentsüh makai alitsü aser tarutsü atema rongsen bendena ayutsü asoshi tashi agütsür," ta lai ashi.

Nagaland kübok tesem balala nung capacity-building inyakyim balala benoka inyakba den lokti tentet balala den longjemer entrepreneur aser professional tem nem tashi agütsütsü atema BAN bendanga agütsür aliba iba sentong ajanga tali jangjashitsür.

ADC Tening-i office belenba indang metetdaktsü

Dimapur, Chiteni/July 21 (TYO): ADC Tening, K. Furhesie Nyuwi-i sangdong ka ajanga, ken o dak sendaka alir ajak dang Tening Additional Deputy Commissioner office belener aoba metetdaktsüogo, aser office ya July 21 nü nungi tenzükba Tening Town Hall anasa office tasenba nung inyaksangshitsü, ta ashi. Ken o dak sendaka alir ajak dang office melenshiba indang temulungdang yur tarutsü nung iba dak ajemdaker inyaksangshitsü kasa sangdong ajanga metetdaktsü.



9th Kohima Town Assembly Constituency MLA Dr. Tseilhoutuo Rhutso aser pa indang Official P.S. aser Party worker temi, 13th Ward KMC Councillor, Panchayat, SMC tesayur & kaketshirtem matsünga Government Middle Schools Lower Chandmari Kohima nung kaketshirtem nem anüshi lemstüba noksa nung angur.

Parliament mezüngnü Lok Sabha senden minute 20 tsüngda thinen



July 21, 2025 nü New Delhi nung tzüngluruwa mongpu Parliament mezüng anogo nung Ato kilonser, Narendra Modi-i osangbenertem den jembidang tangokba noksa nung angur. Kasa noksa nung Union Minister for Parliamentary Affairs Kiren Rijju aser Ministers of State Jitendra Singh, Arjun Ram Meghwal aser L. Murugan nungera angur.

New Delhi, Chiteni/July 21 (Agencies): Tzüngluruwa mongpu Parliament senden tiptema agitettsü nükjidadong nung Amongnü sorkari party ajak senden ka ayongzüka party ajak dang amaliteptsü mepishia liasü, ajisüaka Hombarnü Parliament mezüngnü Lok Sabha senden tenzükbä sülen minute 20 tsüngda thinen.

Lok Sabha nung opposition MP temi, US Tir Donald Trump-i pai tiyongtsüi aita inyakba ajanga India aser Pakistan na tsüngda rara anen ta jembiba atema Ato kilonser, Narendra Modi telangzüba agütsütsüla, ta takhangba agüja yimyim ayima liasü.

Hombarnep Parliament senden tenzüka MP temi kiralongrartemi Pahalgam amakdang asürtem aser Ahmedabad nung Air India tayimtsü tsükokba lendong nung asürtem anem akhüm agüja liasü. Iba sülen opposition MP temi "PM Modi telangzüba agüjang" ta ayimdenba den külemi tangsa 'Operation Sindoor' dak sendakba nung o lemteptsüla, ta takhangba agütsüba ajanga senden nung rongrong adok.

Lok Sabha Speaker, Om Birla-i opposition dang, Question Hour sülen iba onük nung o

lemteptsü atema pai temelaba agütsütsü ta ashi, ajisüaka opposition MP temi maneni sabangleni oa ayimdenba ajanga anüngdang 12:00 ako tashi senden thinen.

Om Birla-i, "Nenoki notice agütsütsüla, aser kechi onük südir süaka ibaji Question Hour sülen ang benoka o lemteptsü. Mezüng anogo nung senden junga agitettsüla aser o lemteptsüla akatsüla. Ni MP shia nem mapang shidak aser maongka agütsütsü," ta ashi.

Birla-isa, "Sorkari onük aika nung telangzüba agütsüner. Senden junga akatsüla. Nenok yimyim ayimtsü atema yagi aru masü. Temzüng aser telatetbatem nung ajemdaker senden akatsüla. Temzüng nung aliba ama onük ajak nung o lemteptsü," ta ashi.

Amongnü party ajak senden nung Union minister Kiren Rijju-i House anaprongla nung senden junga katettsü atema sorkar-opposition amaliteptsüla, ta mepishia liasü.

Hombarnep osangbenertem den jembidang Ato kilonser Modi-i, tzüngluruwa mongpu Parliament ya "Vijayotsav" ama benjungtsü mapang ka lir, ta metetdakja liasü.

Modi-isa alima dang Pakistan ya kiralongrartem

jenokdaktsüba tesem, ta sangdongba nung party ajaki shilem tajung agiba atema pelar, ta metetdakja liasü.

Tan mongpu Parliament Hombarnü tenzükogo aser August 21 nü tembangtsü. Ajisüaka Raksha Bhandan anogomong aser Independence Day anogomong sentong aliba ajanga August 12 nungi August 18 tashi senden khen thinena atatsü.

Opposition-i sorkar dang Parliament nung kiralongrartemi Pahalgam amakba, Operation Sindoor aser India nung foreign policy densema tongtibang onük aika nung o lemteptsü takhangba agütsüba den külemi item onük ajak nung Ato kilonseri telangzüba agütsütsüla, ta jelia takhangba agüja lir.

Tan mongpu Parliament nung sorkari bill 8 benoktsü tebilemba lir aser item bill rongnung National Sports Governance Bill, National Anti-Doping (Amendment) Bill, Manipur Goods & Services Tax (Amendment) Bill, Jan Vishwas (Amendment of Provisions) Bill, Indian Institute of Management (Amendment) Bill aser Taxation Laws (Amendment) Bill densema lir.

Ashim Kumar Ghosh-i Haryana Angh tenangzükbä agiogo

New Delhi, July 21 (Agencies): Shisashir aser yimtenren lenir, Professor Ashim Kumar Ghosh-i Haryana nung 19buba Angh inyaktsü atema tenangzükbä agiogo.

Hombarnü Raj Bhavan nung Punjab & Haryana High Court Chief Justice, Sheel Nagu-i ketdangsüa Ghosh nem tenangzükbä agidakja liasü.

Ghosh ya Kolkata nung aliba College ka nung küm 40 jungnüa Dept. of Political Science nung tongti inyakba liasü. UGC aser ICSSR den inyakba mapang nung pai tongti shilem aika agiogo.

Pai mapang talangka BJP tenzüka aruogo, talisa 1999 küm nungi 2002 küm tashi pa West Bengal BJP Tir inyakba liasü.

Angh tenangzükbä agiba sentong nungji Punjab Angh Gulab Chand Kataria, Haryana Chief Minister Nayab Singh Saini, Haryana Vidhan Sabha Speaker Harvinder Kalyan aser Cabinet Minister tem- Krishan Lal Panwar, Mahipal Dhanda, Arvind Sharma, Shyam Singh Rana, Ranbir Gangwa, Krishna Kumar Bedi aser Shruti Chaudhary nunger aden.

Kasa sentong nung Ministers of State Rajesh Nagar aser Gaurav Gautam na den state Chief Secretary Anurag Rastogi, Secretary to the Governor Atul Dwivedi, MLA tem, Vice Chancellor tem aser tongti ketdangsertem aika aden. Iba sentong nungji Ghosh den pa kinüngtsü Mitra Ghosh-a liasü.

OFFICE OF THE KELINGMEN RIONGSANGER PUTU CHANGTONGYA, MOKOKCHUNG, NAGALAND

TENÜNGSANG AGÜTSÜR

Chiteni (July) 12, 2025 anogo anepdang 6:30 nungi nikonngtsütsü 5 ako tashi tekübok agüja aliba Mozü Shitetertem (Doctor/s);

Dr. Utina Kichu (Dimapur)

Dr. Aotula (Mkg)

Dr. Alemesenla Jamir(Dmp)

Wb. Temsummeren OPT(Dmp)

Item Mozü shitetertem Dimapur aser Mokokchung nungi arua ozü yimdak temang nung mokokmin balala keter alir 257 tashi angari repranga mozü den nüngdakba oset tapu balala agüja yariba asoshi tenüngsang agütsür.

Iba den Kelingmen Ayush Health and Wellness Centre nung inyakerDr. Noksangrenla Jamir-i anir külem inyakertemi nüngdakren ajak nung yaritepba asoshi kanga pelaba shisemer.

Sd/-
O Alemba Jamir
Chairman

Sd/
Bendangtoshi Lkr.
Secretary

2025 Miss Mokokchung... tapak 2 nungi)

Iba aonung tetoktepertemi sobaliba sobutsü nung round ka, cocktail sobutsü nung round ka aser evening gown round ta alitsü. Cocktail aser evening gown ji nüngtugu designer-i puraba sobutsütem asemtsü. Lenla lenla nung nüngtugu artist Moko Koza, Tiameren Aier, Mezanuo Ngukha aser ano Mokokchung nungi kentener aser tsüngsanger telok balalai sabang agitsü renema lir.

Taküm Miss Mokokchung sentong nung Show Director, Nothutso Khamo-i mapang tatsüka agidang, Miss Mokokchung kurang tokteper ajak sakuku tajung lir, teprangi arurtemi menungra-a bilemtettsüsa show ji balaka südaktsütsü renemshidaki, onoki akokba tashi tajungtiba südaktsütsü merangtsü, anungji, iba sentong reprangi arutsü ajak ayongzüker, ta metetdaktsü.

'Küm 3 lir akar asünung ibai nüburtemi kanga dang yongyaseta ataba sentong ka lir, iba ya tetoktepertem asoshi mezüng mera ka lir. Par 13 nungi dang Miss Nagaland 2025 jia adoktsü imlatsür. National level tashi nung tokteptettsü nükla yur Miss Mokokchung ji shimra kanga ajungtsü', ta Femina Miss India Kerala 2024, Akshatha Das-i

ashi. Laisa Mokokchung nüburtemi tobur junga aser pela-a agizükba den kanga junga anepaluba asoshi pelaba ashi.

'Ni tang agi Nagaland-i tanaben arur, aru shia nüburtemi senpet tajung agütsüba den junga agizükba, aser Nagaland nung chiyungtsü aser tsüngsang mongpu ya kanga junger', ta Femina Miss India Manipur 2024, Chanchui Khay-i ashi.

Sentong nung tribute runway ta sür ka alitsü aser iba nungji 1992 nungi Miss Mokokchung nung adoka arur beauty queen parnok7-i shilem agitsü, ta tayongertemisa metetdaktsüogo. Taküm Miss Mokokchung sentong jilia agiba ya tongtibangsa tangalen tetoktepba balala nung Mokokchung nungia shilem agidaktsünüba nükjidadong nung akar, ta parnokisa shisem.

Tetendangertemji guest appearance ana den Shyamanga Kashyap, Mele Pucho, Asola Ozukum, aser Imibenla Wati parnok asütsü. Iba sentong dak sentakba nung yaritepa arur ajak dang pelaba Forerunners Mokokchung züngsem Aren Changkiri aser Sashinungla Nathan nadi metetdaktsü. Ticket jenjang ka senpak 300/- (admit one) aser kaji senpak 1000/- (admit two) asütsü.

Dhaka nung tayimtsü tsükokba atema PM-i tejashi lemsatep

New Delhi, July 21 (Agencies): Bangladesh yimtiba, Dhaka nung tayimtsü ka tsükokba osang angashiba sülen Ato kilonser Narendra Modi-i Bangladesh den tejashi lemsatep aser India-i yariteptsü melunga lir, ta metetdaktsü.

Dhaka nung tayimtsü tsükokba lendong nungji nisung aika asü aser nisung 100 dak tali yiruogo. Parnok teimbaka kaketshirtem liasü.

Bangladesh Air Force indang training aircraft ka Milestone

School & College building nung tsükok. Kaketshirtem class tagidak mapang nung tayimtsüji tsükok.

Ato kilonser Modi-i X ajanga, "Tayimtsü tsükokba lendong nung nisung aika, talisa lanur kaketshirtem aika asüba osang angashia aoksar aser jashir. Onoki mangyimer kibongtem den tejashi lemsateper. Yirua alirtem tekeraba nung aneptsü atema sarasademtsür. India-i Bangladesh den tejashi lemsateper aser akokba tashi

yaritsü melunga lir," ta metetdaktsü.

Bangladesh Air Force indang tayimtsüji China-made F-7 jet liasü. Iba tayimtsü tsükokba sülen anünglen tashi milak tulu adoka liasü. Iba lendong atalokba sülen rescue teams iba tesem jagi oa mi ensep aser yirua alirtem anasa aliba hospital temi anir ao.

Bangladesh chief adviser Muhammad Yunus-i, sorkari iba tatalokba bushisüngdangtsü aser takoksa angurtem nem teyari agütsütsü, ta sangdongogo.



TIR YIMYIM YIMOBILEM (EDITORIAL)

DIMAPUR

SANGTENNÜ

CHITENI 22, 2025

Kiralongra Anema Takok Ka

- Tangsen Lemtur

Taküm April ita nung Pakistan nungi Islamic kiralongrartemi Jammu & Kashmir kübok Pahalgam nung nisung 26 khasetba sülen India nung yimtenren party balala nungi MP temi linük 33 sema Pakistan-i kiralongrartem pusemba aser jenokdaksüba osang sangdonga jajaogo. Iba sülen tawa US-i The Resistance Front (TRF) telok ya Foreign Terrorist Organization (FTO) ka aser 'Specially Designated Global Terrorist' ta sangdongba ya India-i kiralongra anema raraba tongbang nung takok tuluka asütsü. Iba dak alia Pakistan tembar China-ia kiralongrartemi Pahalgam amakba sashia aitsüba den külemi US-i TRF telok ya kiralongrar telok, ta sangdongbaji pelaa agizükogo. Pakistan nung amenoka aliba Islamic TRF teloki, Pahalgam amakba ya par teloki ta parnok sasa tenüng agiogo. US State Department-isa TRF ya Lashkar-e-Taiba (LeT) kiralongrar telok indang front ka, ta shiogo. 2001 küm US-i LeT aser Jaish-e-Mohammad ama teloktem FTO list nung züngoka liasü, ajisüaka iba mapang nungjagi tenzüka item teloki asalentong yanglua mapang shia India tesem balala amaker. US-i TRF ya kiralongrar telok ka, ta sangdongba ajanga TRF ya UN Security Council (UNSC) kübok 1267 Committee nung züngoktsü atema benoktsü asoshi India-i maongka tajung angur. Mapang shia kiralongrartemi India tesem balala amakba agi India atema kiralongra ya tebilemtsü onük tuluka küma India-i iba tongbang anema raraba den külemi alima sabang balala nung Pakistan-i kiralongrartem jenokdaksüba aser yariba sangdonger. Pakistan-ibo parnok par litsü nung kiralongrartem mejenokdaksür ta ashir, ajisüaka iba linük nung kiralongrar telok aika lir. Pakistan nung amenoker arrtsü adena bendang linük balala nung kiralongraba dang masü saka mapang shia kiralongrar ajanga Pakistan-a takoksa angur. Pakistan-i tarutsü lanu putu atema kiralongrar tamajung (security sepaï amakertem) aser kiralongrar tajung (India, Afghanistan aser anüdoklen aliba linüktem anemertem), ta kecha mebendangi kiralongrar telok ajak anema nokdaksüla. Mapang shia kiralongrartemi Pakistan nung shisaliok rejutem amaker. Pakistan nung kiralongrartemi shisaliok rejutem amakba ya ajanga 'jihadi' kiralongrartemi shisaliok anemba sayur, kechiyong shisaliok ajanga linük renloker aser nüburtem nem tashi tali agütsür. Item tatalokbatem nungi tansütsü agir Pakistan-i shisaliok rejutem kümzüka ayutsü atema kanga nendaka inyaktsüla aser tarütsü nung lenirtem/kaketshirtem tiaji kiralongrartem nem mamoksepdaksütsüla. India-i, "Pakistan-i parnok ya 'kiralongrartem ajanga takoksa angurtem' ta jembir. Atangji nungbo, Pakistan ya parnok senotsü agi yariba kiralongrartem aser parnok mesütetba kiralongrartemi nungi timtem meyipa angurtem lir," ta ashir. Taoba mapang British sorkaria, tesüiba kümtem nung kiralongratsü atema asalentong yangluba shilem 70 bo Pakistan nung liasü ta bushiteta liasü. Pakistan ya kiralongrartem jenoka alitsü atema linük tajung ka lir, kechiyong joko Egypt aser Jordan densema Muslim linük aikati 'jihad' pu-masemer. Ajoda tanga Muslim linüktemi inyakba ama Pakistan linükia inyaktsü koka lir. Pakistan sorkar aser mitkartemi par litsü nung kiralongraba anema nokdaker, ajisüaka parnok Afghanistan, India, aser anüdoklen anema inyakba kiralongrartem anemabo mapusor. Pakistan-i 'kiralongrar tajung' aser 'kiralongrar tamajung' ta bendang tashi par linük kodanga tiptema malitsü.

OLEMSABANG

Anü tatsük nungi kümzüka alitsüym

CMO Mokokchung, Nagaland


TEINYAKTSÜTEM (Do's)

Nübur Rangpen Asoshi

(For general population)

Temang nung tzü peria alitsüym (Stay Hydrated)

- * Na metzüra yonga akok tashi tzü peria ajemtsüla.
- * Oli ora dang tzü teti bener senzütsüla.
- * Oral Rehydration Solution (ORS) aser pei sasa yangluba tasentsü tzü, mamatsü, lassi, süngjanglijang tzü amala nung metsü tera inoker ajemtsüla
- * Mongpu balala nung anguba süngjanglijang aser aonsotsü koba nung tzü peria lir, item chiyungtsütem achitsüla. Naring, chiru, züangi, water melon, grapes, lettuce mesüra yamala süngjanglijang aser aonsotsütem nung tzü peria lir.



HEAT ADVISORY

Temang süpoktsüym (Stay Covered)

- * Cotton süoshi tapu aser sentsü tesangwa asemtsüla
- * Kima yimdong nung senzüdang tokolak meyibangtsü asoshi korang, sü mesüra anüshi aponger senzütsüla.
- * Yimdongi aodang shoes mesüra chappal asemtsüla.

Ngala ngashia alitsüym (Stay alert)

- * Radio angaa, TV repranga, Newspaper zünga tzü mopung osang meteta alitsü nüngdak. Tawa tanü tzü mopung osang tejangja metettsü asoshi India Meteorological Department (IMD) website <https://mausam.imd.gov.in/> nung angutsü.

Kilung mesüra akhümbok nung kazüym

(Stay indoor / in shade as much as possible)

- * Taktang koba nung ventilation junga lir aser temokong.
- * Anü aser tatsük aitba tongdanga ayutsüla. Anüngdang window shibanger ayuba ajanga anü tatsük tongdanga ayur. Aonung arudang window lapoka ayuba ajanga taktang mokonga kümdaktsür.
- * Akokba tashi agi kima yimdongi aotsüsa kümra anepdang aser nikongdang aotsüla.

Lendongbang Nung Alirtem Asoshi (For Vulnerable Population)

- * Hauko, anü tatsük ajanga timtem bena aruba nungi nisung shinga jenbua mali, saka nisung karbo iba timtem ajurutsü ana nung lir aser parnok tali kümdangshia alitsü nüngdaker.

Item rogotemji:

- * Kinü tanur aser tila tanurtem
- * Mashisa aliba tetsürtem
- * Moapu nung mapa inyakertem
- * Tokolok tashitak agi menepa alirtem
- * Temolungjang mesüra high blood pressure agi timtema alirtem
- * Ainlen jajar shirnok tomokong tesem nungi tatsük tesem kati arurtem lir, parnokji temang agi tatsük tizükteta maküm tsüngda hopta kabo kima yimdong nung kangabo mejajai akhüm nung kazütsüla aser tzü peria ajemtsüla. Asen temangi anü tatsük tizükteta akümtsü asoshi anogo 10-15 tashibo agitsü.

Tanga Tekümdangtsütem (Other Precautions)

- * Tain rogotem aser shiranga alirtem shirnok pei kija alir, parnok anogoshi reprangshiyima aser temang tendanga alitsü nüngdak.
- * Ki mokonga ayutsü merangtsüla.
- * Anüngdang anü tatsük mapang akok tashi ki aputepa asüba tsünglanglen (downstairs) kazütsü merangtsüla.
- * Temang mokonga alitsü asoshi fan mesüra tzü nung sü metener temang nung neploka ayutsüla.
- * Tzü 20oC nung tetsüng tenüklang tashi ajemoker kazüba ajanga temang kara mokonga kümdaktsür aser yakta anisüngzüak agütsür.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Lenmang nung sayutsüngiba nokdangba anema Arogoi nokdak



The Kingsborough Centre Arogo nung pastor, Babatunde Balogun

July 21, 2025: London nung council kati yimti lenmangtem nung sayutsüngiba nokdangba anema Pentecostal Arogo kati nokdakba sülen tesüsa takok nguogo.

Uxbridge, north-west London nung aliba Kingsborough Centre-i Hillingdon Council-i benokba Public Spaces Protection Order (PSPO) tenokdangba anema ken o benoka liasü.

PSPOs ya yi aser temesepba mozü agi meseper ozüing alema inyakba mapatem nokdangtsü atema lir, ajisüaka Hillingdon Council-i yimti lenmangtem nung sayutsüngiba yaa ozüing alema inyakba mapa ka lir, ta sangdonga liasü.

2023 küm August ita nung Hillingdon council-i, yimti lenmangtem nung sayutsüngia jajabaji ozüing alema lir, aser aibelenertem dang senchi pound sen 100 achitsü ta sangdonga liasü.

Kingsborough Centre pusemba telok Christian Legal Centre (CLC)-i, PSPO sangdongba sülen anogo ka lir Khristantemi Uxbridge town centre nung kaket tilala lemstsü aser posters maa liasü, ajisüaka police-i parnok nokdanga liasü, ta metetdaksü.

Kingsborough Centre Arogoi iba ozüing ya reprangshitsüla, kechiyong tesünep nung ozüing kübok inyakba mapatem PSPO-i nokdanger, ta shia ken o benok.

Parnokisa, council-i jila nung alirtem den jembishinü mesüi parnok melungka agi inyak, ta ashi.

Yaküm High Court-i iba ken o angadangtsü atema melunga liasü, ajisüaka Arogo den tongtepratepba sülen council-i iba ozüing agienogo; iba ya Arogo atema takok ka lir.

Council atema ken o jembitsürtemia, council-i iba ozüing agienogo, ta metetdaksü.

Parnokisa, "Taküm küm tetenzüklen PSPO küm ka ajungba sülen council-i PSPO reprangshiogo. Kobi melii PSPO draft ka sangdongtsü," ta

metetdaksü.

Hillingdon council-isa Arogoi legal atema indokba senotsü ajakji Arogo nem agütsütsü melungogo.

Kingsborough Centre Arogo nung pastor, Babatunde Balogun-i, "Kü melung kanga anisüingzükogo aser ni kanga pelar," ta ashi.

"Iba ozüing ya tetsükdaksü ka liasü; iba ozüing ajanga onoki Uxbridge nung nüburtem den Khrista osangtajung melemsateptettsü ta bilema liasü," ta pai ashi.

"Timtem ajangshiba atema onoki sasar, ajisüaka tang nungibo yimti lenmangtem nung sayutsüngiba atema shinga nem-a temerenshi magütsütsü atema council aser police na tsüngda angatettpa inyaktsü asoshi onoki sarasademer," ta paisa shisem.

"Onok indang mission ji Uxbridge nung Yisu Khrista dak anguba teimla aser temeim sangdongtsü atema lir. Onoki nüburtem tenzükba maparen ya menokdangtsüla saka nungita yaritsüla. Iba ken o aser tatalokba ajanga linük tesem ajaklen tatishitsü tajung agia kasaji inyaktsü, ta onoki amanger," ta pastor-i ashi.

CLC Chief executive, Andrea Williams-i, tesüiba küm ishika yimti lenmangtem nung sayutsüngirtem apuba tatalokbatem ya tebilemstsü onük ka lir, aser Arogoi iba ya anema menokdak asübo PSPO ajanga UK tesem ajaklen Khristan outreach ministries nung tetsükdaksü ajurula," ta metetdaksü.

"Khristantemi moapu nung sayutsüngiba ya UK nung akhidang nungi benshia aruba lir, aser iba ya pei tebilemba sadoka jembiba tongshi ka lir," ta lai ashi.

Laisa, "Council-i shisadangba sülen iba tenokdangba agienba atema onok pelar. Ajisüaka iba ken o ya linük tesem ajaklen ketdangsertem atema tansütsü ka asütsüla," ta ashi.

"Onoki Arogotem aser

Khristan outreach ministries dang künküma alitsü aser item ama tenokdangba osangtem metetdaksütsü ajungshir," ta lai ashi.

"Khrista osangtajung lemsatepbaji ozüing alema inyakba mapa ka masü. Nüburtem nem teyari balala agütsüba aser tanela tsütsü nungitba mapaji ozüing alema inyakba mapa ka masü," ta laisa metetdaksü.

ANOGO ABEN TSÜNGREM DEN

Tsüngrem temeim

"Aser teimlai makdaktsür, kechiaser asenok nem agütsüba Tanela Temeshi ajanga Tsüngrem temeim asen temulung nung moshia lir" Rom 5:5.

Iba tekong nung temoatsü lephsia ashir, Tsüngrem temeim moshidaktsür, aser Tanela Temeshi asenok nem agütsür. Asenoki item temoatsü ana mepiladaktsütsüla. Tanela Temeshiji amangba pur shia nem teti asoshi agütsü nungji, tang Tsüngrem aser Yisu Khrista, Tanela Temeshi ajanga asenok den alir. Pai asenok kodanga medoktsütsü mesüra mesendoktsü. Paji kimong kong asenok kümüzka alir, ayongpang nungi temoatsü ayimer.

Anüngtemi Tsüngrem sentsüwangshi sangdonger. Tenemtemi Tsüngrem teka mapa sayur: Tzü, Pa ain, mopung, Pa tematiba tashi teyanglushiba shilem shiai Pai yanglubatem shisatsü sayur. Saka Pa temeim koda ? Khrista kangki ajanga dang Tsüngrem temeim tesangwa sayur.

Kangki atena oa asenoki Tsüngrem temeim mereprangtsüla. Khrista mapatem jungkai adokdaktsütsü asoshi Pai Tanela Temeshi agütsü. Aseni kangki dangi arudang Pa sentsüwangshi angazüker, aseni Tsüngrem temeim angur. Iba tekong tali asen temeim asündangtsü menündak. Tsüngrem temeim talubusa ajak mulungjang nung agütsü. Ibai inyakogo ta amangang. Ne tanela iba ayongpang nung metenang. Ne mulungjang iba temeim agianidakjang. Iba temeim nung talem agiang.

Oba, Ne temeim kü dang aser alima dang jungkai adoktsü nung Ne tenüng asanger.

Turkey ketdangsertemi Khristan ka Iran linüki meyipa yokogo



Mehran Shamloui

July 21, 2025: Iran nunger Islam yimsü toktsür Khristan yimsü dangi meyipsang, Mehran Shamloui, Turkey nungi Iran-i meyipa yokogo.

Iran nung pa tepuokdak küm 10 ayutsü atema obendang agüja liasü, ajisüaka pai jena oa Turkey nung lia apuba sülen July 3 nü Turkey ketdangsertemi pa Iran-i yokogo.

Pa tayimtsü ajanga Iran nung aliba Mashhad International Airport atongba mapang nung Iran ketdangsertemi pa apu.

Human Rights Activists News Agency (HRANA)-i ashiba agi, Shamloui'er kibong züngsemtemia Iran nung ketdangsertemi pa apuba osangji lemsatepogo.

"Pa Iran nung Mashhad Airport atongba mapang nung pa apuba sülen local security facility kati anir ao. Pa tepuokdak ayutsü obendang agüja lir, anungji judge kati pa Tehran (Iran yimtiba)-i anir

Khristantem Iran linüki meyipa yoker.

Mission Network News report ajanga ashiba agi, Voice of The Martyrs telok nungi Todd Nettleton-i, Turkey ketdangsertemi Khristantem Iran linüki meyipa yokba ya Khristantem anema inyakba asalentong ka lir, ta metetdaksü.

"Turkey nung Khristan nütsüng ajema kümdaktsütsü aser Khristan ministry tashi meitdaktsütsü atema iba ya Turkey sorkar asalentong ka kümogo," ta Nettleton-i ashi.

Turkey sorkari Khristantem anema "N-82" codes amshia linük nungi Khristantem meindoker. N-82 codes kübok linük security atema amokmeren, ta shia Khristan aika linük nungi meindoker mesüra linük telungi maitdaktsür.

Turkey nung Alien Act kübok Arrla 9 nung ajemdaker Turkey linük telungi bendangertem maitdaktsütsü atema ketdangsertem nem temeden agütsür.

Yaküm November ita nung European Centre for Law and Justice (ECLJ)-i report ka ajanga, Turkey nung Arrla 9 ya Khristantem anema amshir, ta metetdaksü.

"Khristantem tamang aser missionary mapatem nokdaktsü atema iba ozüing kübok Khristantem anema inyaker, ajisüaka iba ozüing kübok Muslim nunger missionary tem anemabo meinyaker," ta ECLJ-i metetdaksü.

AO OSHI ANGAZÜKDAK: TANÜ ANGAZÜKTSÜBA OJANG



Tir Yimyim


Terok

- (n) temang nung tebang alema luli chiyongtsü meyokdak shilem (throat)
 * Terok merüka ayutsü atema temenen chiyongtsü machitsüla.

Terokrok

- (v) ajemajema melitet arakzükbä, tajazü (restless)
 * Kanga terokrok purtemi lendong melameläa menar.

OLONG PAITEP # 7216



TIPLÉN

1. Meyipa agütsütsü aliba - 6
3. Kilitsü asoshi alizüka ayuba - 4
6. Anü ayiba mapang - 10
8. Shitak masü - 3
9. Tezüng asoshi metsüba shiruru - 3
11. Injang oset - 10
12. Mezüing - 4
13. Kecha nunga tagidak mali - 4

LANGTSÜNGLEN

1. Akhüm aser mopung agütsür - 8
2. Tai melena sen achiba - 6
4. Tenem tekong kecha mali - 6
5. Nü dang tambu - 3
7. Kecha mali (maka) - 6
8. Alia bilemba shisatsü - 6
9. Ana aküm - 6
10. Molunga langzü - 3

OLONG PAITEP # 7215 TELANGZÜBA


TIPLÉN :

1. Meyi, 6. Shin, 7. Yimkong,
9. Tera, 11. Teberem, 12. Anem,
15. Senmang, 17. Tenü, 18. Anep.

LANGTSÜNGLEN :

2. Yim, 3. Tanü, 4. Shilem, 5. Ano,
7. Yakta, 8. Kilem, 9. Tenem,
10. Amang, 11. Tenüing, 13. Mela,
14. Ita, 16. Ain.

NAI-A YA METETTER MA



Ajaki kanga sapua reprangba Tom and Jerry cartoon ya American animated media franchise aser comedy short films series ka lir koba William Hanna aser Joseph Barbera nati 1940 küm mezüing yanglua liasü. Iba series ya danü ka tenüing aser Tom aser koya ka tenüing agi Jerry na indang otsü ka lir. Küm tem tsüngda series dak alaka Tom aser Jerry na indang film-a aika yangluogo aser iba series yagi award-a aika nguogo, kong Hanna aser Barbera nati 1940 nungi 1958 tashi Tom and Jerry shorts 114 direct asüba mapang Academy Awards for Best Animated Short Film tenet anguba densema lir.

China-i Brahmaputra nung dam yangluba ya tang atemabo shibulutsü mali: Assam CM

Guwahati, Chiteni/July 21

(Agencies): Assam Chief Minister Himanta Biswa Sarma-i Hombarnü ashiba agi, China-i Brahmaputra ayong nung tzünokdang tulu ka yangluba ya tang atemabo kecha shisabulutsü mali, kechiyong iba ayong indang primary water source temji India aser Bhutan na nung lir.

Guwahati nung sentong ka agiba mapang osangbenertem den sensaksemdang Sarma-i, "ni tang tangbo shibulu masür kechiyong Brahmaputra ya ayong tulu ka aser source ka dak dang metaloker mali," ta ashi.

China-i, Arunachal den arrtsü anasa Tibet kübok Brahmaputra ayong nung USD billion 167.8 intoka yanglutsü aliba tzünokdang ya Honibarnü nungi yangluo tenzüko. Iba ajanga northeastern India nung ayonglanglen alirtem dak



kongshitsü akok ta aikati süoki ia bilemer.

Tzüng nokdang ajanga Assam dak kongshitsü ana nung aliba indang asüngdangba mapang Sarma-i, iba ajanga Assam dak koda kongshitsü iba indang osang tejangja memetet ta ashi.

"Scientific tebilemdangba ana lir. Kati ashiba agi, ayong ayimba minprongra tzu tajemba akümtsü aser biodiversity dak kongshitsü. Tanabubaji tzu tajemba akümba ajanga tzümtsüng azüoktsü. Koba shitak aji ni memetet," ta pai

ashi.

Chief Minister-i ashiba agi, Brahmaputra nung tzu ya timba Bhutan, Arunachal Pradesh aser Assam nung tzünglu aruba mapang yimoker aser China nungidangbo ajunga yima malur.

Sarma-isa, Centre sorkari tensa kanga kümdanga asadanga atadar, ta ashi. "Centre-i iba ken o ya tajungba asatettsü. Parnoki China den sensaksem tenzüker alitsü, ajita mesüra onoki ken o dak sendakba nung sensaksem tenzüksü," ta pai shisem.

Manipur nung security force temi temesepba mozü shibelener ana apu

Imphal, Chiteni/July 21

(Agencies): Central security forces aser Manipur civil police na senteper taoba ghonda 36 tsüngda tesem balala meita aoba mapang temesepba mozü shibelener ana puogo.

Ketdangsürtemi Hombarnü ashiba agi, Assam aser Myanmar den Manipur arrtsü nung shibelenerntem jajaba lenmang meita aoba mapang sen crore 100 alang temesepba mozü pua liasü.

Mezüngbuba meita aoba mapang Assam Rifles aser Manipur Police nati Singjamei Police Station kübok Singjamei Chinga Makhong nung Maruti A-Star temesüng ka sota bushisüngdangba mapang soap

case ter nung heroin bener lia nguteta liasü.

Parnoki gari ania alisang Md. Azad Yumkhaibam puogo, shiba Irong Umang Khunou, Thoubal district kübok Irong Cheisaba nung alir. Iba team yagi gari den heroin gram 105.4 pua liasü.

Tanabuba meita aoba mapang kasa team yagi Rangirkhari, Silchar, Cachar (Assam) kübok Kanakpur Part-II nung alir Mihir Roy apu. Jiribam district nung Borobekra Police Station kübok Savomphai aser Chaudharykhal na yongtsü nung passenger tem mashi mashi bushisüngdangba mapang pa apu.

Pai brown sugar seret 10.096 soap case 616 nung bener lia ngutetogo. Paisa, temesepba mozü seret 5.280 juli 250 nung bener liasü.

Tasembuba meita aoba mapang team yagi Sajik Tampak, Chandel district nung temesepba mozü ngutetogo. Temesepba mozü bona alirtem ya jena oa liasü. Parnoki toktsüba motorcycle ana ya asadanga sülen sen crore 2.52 alang opium seret 50.5 aser 1.24 crore Kyats (Burmese currency) aser India sen lakh 2 nguteta liasü.

Ketdangsürtemi temesepba mozütem ya Chakpikarong Police Station nem bendanga agütsüogo.

Justice Ashutosh Kumar Gauhati High Court Chief Justice kümogo


Guwahati, Chiteni/July 21

(Agencies): Assam Governor Lakshman Prasad Acharya-i achaayanga Justice Ashutosh Kumar tenangzüktepba agiogo. Iba sentong nung Assam Chief Minister Himanta Biswa Sarma densema tanga tongtibang lenirtem dena liasü.

Justice Kumar ya Patna High Court indang Acting Chief Justice liasü aser tang Gauhati High Court Chief Justice kümogo, koba ajanga Assam, Nagaland, Mizoram, aser Arunachal Pradesh achaayanger.

Justice Kumar ya October 1, 1966 küm aso aser pai tajangshiba aika bener tang mapa tasenba agizükogo. Pa ya St. Stephen's College nung graduate asü aser iba sülen Campus Law Centre, Delhi University nungi law degree agizüka liasü.

Pa 1991 küm nungi Patna



JUSTICE ASHUTOSH KUMAR

High Court nung law practice asü tenzüker aser pa criminal law nung mongin ka küma pai ken o tongtibang aika bentettsüogo, kong tasüba agi merenshiba nisungtem indang ken o densema liasü.

Justice Kumar ya 2014 küm Patna High Court nung Additional Judge asütsü shima liasü.

Iba sülen taruba küm pa Delhi High Court-i yok. 2025

küm January ita pa Acting Chief Justice ama Patna High Court-i meyipa ao.

Tir Droupadi Murmu-i pa Gauhati High Court Chief Justice asütsü shimba July 11 nü formalized sütsüogo.

Pa tenangzüktepba agiba sentong nung Gauhati High Court obendangertem, state ketdangsür tejentem aser legal fraternity nungi züngsemtem densema liasü.

Israel sepaitemi Gaza nung Palestine nunger 115 tepset

Gaza City, Chiteni/July 21 (Agencies): Israel sepaitemi Gaza tesem balala nung Palestine nunger 115 tepset aser yangji linük north tsütsü Zikim crossing nung chiyongtsü meshidang aser south len Rafah aser Khan Younis nung teyari agütsüba tesem nung nisung 92 khasetba dena lir.

Israel-i tanen makai Gaza sabanga yur amakba ajanga nüburtem yasa-tzüraba tali kumdaktsür lia Deobarnü item nisungtem ya tepset aser health ketdangsür temi tesüiba anogo yasüta asüba nisung 19 lir ta sangdong.

Zikim nung Israel sepaitemi Palestine nunger 79 shi khaset ta medical osangte ajanga ashir, kong United Nationd aid convoy nungi am (flour) angutsü teimla nung lokti tuluka adenshia liasü.

Rafah nung aid point ka anasa nisung toku tepset, kong ghonda 24 tejakdang nisung 36 takum samar liasü. Khan Younis nung teyari agütsüba tesem tanabuba anasa nisung pezü tepset, ta Palestinian Civil Defence ajanga ashi.

Israel mitkaria yangji amak ta nangzükogo aser northern Gaza nung sepaitem asoshi lendong aliba agentsü asoshi "warning shots" khaloktsü ta ashi. Ajisüaka parnoki iba lendong aliba indang kuli mesüra tejangja magütsü.

UN indang World Food Programme (WFP) ajanga sangdong ka agütsüba Israel-i ashiba den mapeter, aser asürtem ya aya marem parnok aser parnok kinungertem achi-ajemtsü asoshi chiyongtsü meshitsü meranga liasü ta ashi.

Chiyongtsü bena aliba trucks 25 convoy ka Zikim point ajangli Israel nungeri nisung khasetba ya atalok ta parnoki ashi.

"Checkpoint tatembangba

ajangli civilian telok tuluka chiyongtsü nüngdanga kanga yongyaseta ataa liasü," ta agency ajanga ashi. "Convoy parnok tonga aoba mapang temeket nung aliba nisungtem dak Israel nunger tanks, snipers aser prangbong balala agi akha."

Gaza nung humanitarian agencies atema operational conditions tajungba kumdaktsütsü ta Israel-i shiaka azüdokshi ajuru, ta WFP ajanga ashi. Convoy jajaba lenmang nung armed forces tema malitsü ta Israel-i shia liasü.

"Gaza nung yasa-tzüraba jenjang tasen ka tongogo. Humanitarian assistance maliba yong nüburtem asür. Malnutrition tali akumer aser tetsür aser tanur 90,000 shi tangsa teyari nüngdaker. Nisung asem nung k abo anogo aika chiyongtsü Machir," ta WFP ajanga ashi.

"Chiyongtsü jenti lema agütsüba ajanga dang tensa azüoktsü aser chiyongtsü tali arur ta parnok tsüngta tamang katettsü," ta ashi.

Gaza indang Ministry of Health-ia kasaji tekumdagtsü ashi aser yasa-tzüraba ajanga Deobarnü Palestine nunger nisung 19 asü aser ano noklang aika chiyongtsü maka yakta asütsü.

2023 küm rara tenzüker tanur 71 chiyongtsü peria manguba agi süogo aser ano nisung 60,000 chiyongtsü peria machiba temaitsütem lir, ta ministry ajanga ashi.

Gaza south lena Rafah aser Khan Younis nung United States-i yaria GHF ajanga lapoka aliba distribution points anasa chiyongtsü ataa aliba nisung 13 Israel sepaitemi tepset.

Ibaji ajanga May ita nungi

tenzüka GHF tesem nung mesüra anasa Palestine nunger tepsetba nisung 1,000 tajunger.

UN aser humanitarian aid agencies temi mapang talangka nungi Gaza nung teyari agütsüba nung GHF ya nok-nü ama amshir ta aija arur aser Israel dang humanitarian assistance yoktsü melang ta ajungshia arur.

UN agency for Palestinian refugees, UNRWA indang tekolakba Philippe Lazzarini-i ashiba agi, Gaza nung aliba staff temi chiyongtsü agi anüngba osangtem yoker.

"Ajak ya nisungi yangluba lir. Kilometre ishika dang pilar chiyongtsü lir. UNRWA ajanga Gaza ita asem mesütsü chiyongtsü peria arütsü nung lir," ta pai social media X nung ashi.

Ajisüaka Israel-i March 2 nü nungi teyari oset ajak nokdanga lir.

US nung amenoka aliba Council on American-Islamic Relations (CAIR) ajanga Israel-i tanen makai teyari bushir amakba aija liasü.

"Yaseta aliba Palestine nunger tetsür, tanur aser tebur tem US-i agütsüba nok-nü agi tepsetba aser pei kibong mesütsü asoshi chiyongtsü bushiba ya human tragedy masü, ibai Western political order ka lir, shirnoki mapa meinyakba ajanga iba kin ajunga samatsütsü mapa inyakteter," ta CAIR indang national executive director Nihad Awad-i ashi.

"Anüolen aliba sorkar temi memetet amai mesayutettsü. Tai maket civilian tem asaa yasa-tzüradaktsüba, tashiyim amshia tesem balalai arishiba aser tepsetba parnoki repranga lir aser kecha meinyaker. Gaza nung Western world ajanga iba ama inyakba ya puti otsü nung teti alitsü."

Bangladesh Air Force tayimtsü ka tsükok, nisung 19 asü

Dhaka, Chiteni/July 21 (Agencies): Bangladesh Air Force F-7 BGI training aircraft ka Hombarnü ali nungi ayamesor mapang tatsüka tsüngta Dhaka north tsütsü Uttara nung school campus ka nung tsükoka nisung 19 asü aser 100 dak tema yiru, ta yangji alirtem osang ajanga ashi.

Iba lendong mechi Bangladesh sorkari Mongulbarnü linük tesem ajunga nung mangyimtsü sangdonga lir, ta Daily Star ajanga ashi.

Bangladesh interim government indang Chief Adviser Muhammad Yunus-i asükhu lemsatepogo aser linük asoshi temulung shirangba mapang ka lir ta ashi.

Iba lendong atalokba

bushisüngdangtsü atema sorkari nüngdakba mera agitsü ta ashi.

Bangladeshi news outlet ProthomAlo ajanga ashiba agi, tayimtsü ya nikongdang 1:06 ako nung ayameso aser mapang tatsüka tsüngta Uttara nung nisung aliba tesem ka nung tsükok.

Lendong atalokli osang kar ajanga ashiba agi iba F-7 BGI tayimtsü ya Milestone College nung canteen ka indang kilem nung oa tsükok.

"Tayimtsü ya gate nung tsük aser anasa tsükok. Tayimtsü tsükokba mapang kaketshirtem class telung nung class agia liasü. Yirurtem ka khen ka ta anizük," ta Milestone School and College odongtar Shah Bulbul-i ashi.

Iba tayimtsü tsükoker

tangokba video tem nunga moapu anasa mi tulu jangrua liasü aser anünglen mokozi alonga nisungtemi meta nungi repranga liasü.

Tayimtsü ajasar alidak firefighter temi tzü shiokja liasü, koba ki ka tezülen oa atsük amai ajiteter, kong iron grills raksa aser iba ki nung tapok tuluka adoka liasü.

Tanur aser tain densema nisung 50 dak tema temang rongsar mozüki bushia bener aru, ta National Institute of Burn and Plastic Surgery ajanga osangbener dang ashi.

Bangladesh indang armed forces ajanga Facebook nung sangdong ka agütsüba nung F-7 jet ya training exercise asoshi ayamesoba sülen mechanical fault ka liasü ta ashi. Asürtem rongnung pilot dena lir.

MENUNGRA BILEMTETER

Lt. RONGSECHILA



21.09.1966 - 22.07.2024

Kü temeim kinungtsüi onok toktsür Kibuba kidangi aoba sülen tanü küm ka ajungdang onoki la kanga menungra bilemteter.

Na onok den taküm meliaka, nü temeim anepalu aser asenok külemi aliba temenungratsü anogotem onok mulungjang nung teti alitsü aser onok sarasadem nung teti bilemtettsü.

Onok ajaki na kanga menungrar !

~ Temeim Kinungbo & Kinungertem.

Pelaba Lemsateper

Onoki teti dang meima aser akhümtsüba aliba Pastor Rev.Tiawati Imsong (Chuchuyimpang), iba alima nungi 2025 küm July 17 nü Kibuba Yisu Khristai jar ogo.

Pa asüba anogo nungi tenzüka Ao Baptist Arogo Mungdang, Ongpangkong Arogo Tenzüker Telongjem, Ao Baptist Pastors Fellowship, Chuchuyimpang Yimden, Chuchuyimpang Union Dimapur, Chuchuyimpang Union Kohima, MLA & Advisor Wb.Imkongmar aser iba den külemi tenüng teta meshiaka yimden, arogo, lokti tentet balala, kija kibong kwinakati temeim mulungsentsü agi aria bilema ozü Chuchuyimpang Baptist Arogo den Dimapur nungi tasoyim Chuchuyimpang tashi mang abenba mapang nungi tenzüka sarasadem, shisatsü, nübo, rongsen aser pei akokba tashi agi ozü arogo tako marok ajemba mapang lemsatepa yaritepogo, nenok ajak dang kanga pelaba.

Ozü Arogoi nenok ajak dangi tsüngdong aruagi onok pelaba melemsateptet nung iba osang ajanga nenok ajak dang maneni kangasa pelaba lemsateper. Nenok mapa tajung asoshi asen Tsüngremi nenok ajak azükarujangma ta ozü arogo tamang sarasadem lemsateper.

Kibubar Wadang nung ;
Deacon Board
Chuchuyimpang Baptist Arogo

Watsü Mungdang-i sangdonger

23 Buba Watsü Inti Mungdang Rongchii (April) 10-11 2025 anogo amungdang Watsü Mungdang office ki asütsü atema Aotsür küm 18 nungi tema tetsürshia kenü nübu taa (one day wage) sarutsü lemtetba ama Aotsür ajaki tangatetba tajung nung agütsütsü iba sangdong ajanga lemsateper.



Wt. Tianaro Jamir
Tir



Wt. T. Narola Longchar
Tongti Zülur

Premium Car Seat Booking Service

(Innova & Kia Carens) Mokokchung nungi Dimapur & Dimapur nungi Mokokchung.

Service anogoshi lir!

Gari nung nü menden onok indang app ajanga mükaang – QR code scan süang mesüra Google Play store nungi download sür mükaang.

Offline ajanga mükaner asü ? Anasatiba counter den jembiang:

Dimapur: 8731912892 (Location. ISBT Purana Bazar)

Mokokchung: 8414944634 (Location. Marsosang Complex Opposite IDBI Bank)

Tang item lenmang nung senzür:

* Dimapur - Mokokchung

* Dimapur - Tseminyu

Saksalema senzüang. Anisüngzüka senzüang.

Nü indang premium seat tanü mükaa yang!



ALI TAYOKTSÜ LIR

At Naga United Village - Dry Land @ Rs. 380 Per Sq.ft. (100 x 100 / 100 x 80) Approach Road touch Ph: 8798119488 / 8974571416

ALI TAYOKTSÜ LIR

Seithekidema 'A' Dry Land. @ Rs. 140 per Sq.ft. Negotiable 30,000 Sq.ft. Ph: 8974571416 / 8798119488

FIDE Chess World Cup India nung asayatsü



Chiteni/July 21, 2025 (Agencies): 2025 FIDE Chess World Cup ayongzüka asayatsü atema India nem maongka agütsüogo. Iba asayamung ya October 30 nungi November 27 nü tashi asayatsü.

Iba asayamung nung asayar 206 takok marok aser 2026 FIDE Candidates Tournament atema qualify asütsü asoshi tokteptsü. Asayamung koba yimti nung asayatsü iba indang osang tang tashi agüja mali saka takaratiba nung metetdaksütsü imlar.

"Kümtem tsüngda iba asayamung ya format balala nung asayaogo, saka 2021

küm nungi single-elimination format ka benoka asaya arudar. Round shia anogo asemsem asayar; mezüngbuba anogo ana classical games ana aser iba sülen nüngdak dang süra tasemnübuba tie-breaks asayar," ta FIDE-i ashi.

"2025 World Cup nung temaba jenjang nung tembangba asayar asem 2026 Candidates Tournament atema qualify asütsü, koba ajanga World Chess Championship challenger jangjar," ta FIDE-isa metetdaksü.

"FIDE World Cup 2025 India nung ayongzüka asayatsü atema onok yongya

atar. India nung chess asaya ya kanga junga yangloka lir aser aikati kanga sapua asayar. India nung chess asaya fan tem tejangraba ya teti jangrademtsüka aser on-site aser online ajanga nisungtem aikati iba asayamung reprangtsü imlar," ta FIDE CEO Emil Sutovsky-i shisem.

Iba asayamung nung India nung asayar R Praggnanandhaa, Arjun Erigaisi, D Gukesh nungi shilem agiba angutsü. Top 50 nung aliba asayartem mezüngbuba round atema bye angutsü aser 51 nungi 206 tsüngda aliba asayartem top half aser lower half na tokteptsü.

India-i tawa 2022 Chess Olympiad, Tata Steel Chess India, 2024 World Junior U20 Championships, aser FIDE Women's Grand Prix leg 5buba ayongzüka asayaogo.

India quarterfinals nung tsükogo

BADMINTON ASIA JUNIOR MIXED TEAM C'SHIPS

Chiteni/July 21, 2025 (Agencies): Badminton Asia Junior Mixed Team championship nung India junior badminton team-i kanga meranga asaya, saka taoba mapang champion Japan team 110-104 agi mekoki quarterfinals nung tsükogo.

Relay scoring system ka kübok kanga toktepbba asayaba asaya ka nung mezüngbuba asaya 11-9 agi makokba sülen India team-i kanga junga asaya tenzük. Tebur tarep asayar Bhargav Ram Arigela aser Viswa Tej Gobburu nati India asoshi mezüngbuba asaya akok aser iba sülen tetsür tarep asayar Vennala Kalagotla aser Reshika Uthayasooriyan natia asaya koka India team 33-26 agi tejakdang aküm.

Iba sülen Reshika aser Bhavya Chhabra nati maneni asaya koka 44-35 agi India tejakdang aküm aser Rounak Chouhan-ia takok ngua liasü.

Asaya nung mapang timba ka India team tejakdang liasü, saka asaya tatemi Japan team-i tajungba asayateta parnoki tatembangbuba asaya pongu atonga koka liasü. Item asayatem ya aika kanga toktepa asayarang koka liasü.

Iba asayamung nungi tsükaka India team-i kanga junga asayaogo. Parnoki Group D nung Hong Kong China, United Arab Emirates, aser Sri Lanka koka parnok temaba jenjang nung quarterfinals-i ai.

Asayamung nung Bhargav aser Viswa Tej na tarep aser Reshika o Vennala na tarep nungeri kanga junga asayaogo aser tarep asaya nungsa C Lalramsanga-i Bhavya den longjemer tebur tarep asaya aser Taarini Suri den longjemer tarep temeyoktepa asaya kanga junga asayaogo.

Kija asaya nung Rounak-i, world junior No. 5 Lam Ka To akok aser Rujula Ramu-i top 20 nung aliba asayar ana koka liasü.

Mixed team junior championship ya Badminton Asia-i ayongzüka kümshia asayar, kong lanur asayartem tebur aser tetsür kija aser tarep asaya aser tarep temetoktepa asaya nung tokteper.

Mixed team badminton asayamung mezüngbuba ya 2006 küm asaya liasü. Badminton Asia Junior Mixed Team Championships ya India team-i khen danga koka mali.

Asia Cup atema India-i arutsü tejangraba mali: Tariq



Chiteni/July 21, 2025 (Agencies): Pakistan Hockey Federation-i sangdong ka ajanga FIH dang, security dak sendakba nung taruba Asia Cup atema parnok indang national team India-i meyoktettsü ta shiogo.

PHF tekolakba Tariq Bugti-i, asayartem India-i aotsü atema süoki ia bilemba lemastepogo, kechiyong taküm küm tetenzüklen linük ana tsüngda rara adokba sülen tang tesendaktep mejungi lir.

Bugti-i ashiba agi, iba continental asayamung metenzük tsüngda PHF-i parnok tamendakdak FIH nem metetdaksüogo. Iba asayamung ya taruba küm FIH World Cup atema qualifier lir.

"Onoki parnok dang tang tensa apir onok team India nung asayatsü ya security dak sendakba nung tetsükdaksü adoktsü ta shiogo," ta Bugti-

i ashi.

"Onoki parnok dang onok asayartem Asia Cup atema India-i oa asayatsü atema tejangraba maliba metetdaksüogo, koba qualifying asayamung ka lir," ta pai shisem.

Bugti-i ashiba agi, par team nem security agütsütsüji FIH dak keta lir aser asayartem tekümzükbba kübok or arutsü atema AHF dak keta lir.

"Onoki parnok dang India nung onok asayartem tekümzükbba kübok toktsütsü ta asüba tenangzükbba ka meshiogo, ajita asünung dang onok asayamung dak rangloker asayatettsü," ta pai ashi.

April ita kiralongrartemi Pahalgam amakba sülen kidanger ana tsüngda tensa kanga mejungi aküm. Iba sülen India-i Pakistan kübok kiralongrartem tesep balala

aser airfield tem maka liasü.

Anogo ishika raraba sülen linük ana tsüngda ceasefire ka benokogo, ajisüaka tesendaktep kanga mejungi raksaogo aser iba ajanga asaya aika dak kongshia odor.

England den tanungba Test nung Reddy masayatettsü

Chiteni/July 21, 2025 (Agencies): India nung all-rounder Nitish Kumar Reddy temekok yiruba ajanga England den tanungba Test asayatem nung masayatettsü.

Board of Control for Cricket in India (BCCI)-i ashiba agi, arishi küm 22 tain asayar ya kidangi meyipa aotsü aser rehabilitation tenzüktsü.

Iba hopta asayatsü aliba Test pezübuba nung seamer Arshdeep Singh-a masayatettsü, shiba temeyong yiruba sülen masayatettsüsa kümogo.

"Pa (Arshdeep) Beckenham nung training session mapang net nung ball aonba mapang teka tabelen nung temeyong jemtsüba yirua liasü," ta BCCI-i ashi.

"BCCI medical team-i pa asadanga atadar."

Old Trafford nung Bodhbarnü nungi tenzükba asayatsü aliba Test pezübuba atema India-i uncapped all-

rounder Anshul Kamboj squad nung züngoksemogo.

England nung Test ana asayaba mapang Reddy-i junga masayatet aser Edgbaston nung pai wicket ka danga magi aser innings anaprongla nung run kaka dang yanglua liasü.

Taoba hopta Lord's nung asaya makokba mapang pai run 82 agütsür wicket asem agi aser innings anaprongla senteper run 43 yanglua liasü.

Left-arm fast bowler Arshdeep bo Test ka nung danga asaya mali.

Kasa mapang nung fast bowler Jasprit Bumrah Manchester nung asaya dak tsütsü masayadaksütsü mejangja, kechiyong pa asaya ajak nungbo masayadaksüi anisüngzükdaksütsü atema

inyaktepa arudar.

Bumrah iba asayamung nung Test asem nung asayatsü lir aser pa mezüngbuba aser tasembuba Test nungbo asayaogo.

Wicketkeeper Rishabh Pant-a, Lord's nung asayaba mapang temeyong yiruba sülen pa specialist batter ama asayatsü akok.

Test pezübuba atema India squad:

Shubman Gill (captain), Rishabh Pant (wicketkeeper), Yashasvi Jaiswal, KL Rahul, Sai Sudharsan, Abhimanyu Easwaran, Karun Nair, Ravindra Jadeja, Dhruv Jurel (wicketkeeper), Washington Sundar, Shardul Thakur, Jasprit Bumrah, Mohd. Siraj, Prasidh Krishna, Akash Deep, Kuldeep Yadav, Anshul Kamboj.

BILEMDANGANG

"Takok tulu angutsü atema mapang agir, anungji maneni inyakang."